



Sesida dals

Communitgà ils

Protocol nr.

13 d'avust 2019

14 d'avust 2019

558

Dumonda Müller (Susch)

concernent la finanziaziun dal parc naziunal svizzer

Resposta da la regenza

Cun la lescha federala dals 19 da december 1980 davart il parc naziunal (lescha dal parc naziunal, LPN; CS 454) ha il parc naziunal svizzer (PNS) in'atgna basa giuridica. Tenor l'art. 2 LPN è la fundaziun da dretg public "Parc naziunal svizzer" la purtadra dal PNS. L'art. 3 LPN regla la finanziaziun dal PNS. Ina cofinanziaziun tras il chantun n'è betg prevista. Cun il conclus dals 6 d'october 2006 (en vigur dapi il 1. da december 2007) ha la confederaziun stgaffi las premissas legalas per installar e per manar parcs d'impurtanza naziunala, e quai en ina revisiun parziala da la lescha federala dal 1. da fanadur 1966 davart la protecziun da la natira e da la patria (LPNP; CS 451). Igl è vegnì desistì d'armonisar il status giuridic dal PNS cun la LPNP reve-
dida.

La pussaivladad da finanziair parcs d'impurtanza naziunala sco er instituziuns cun il medem status (patrimonis mundials da la UNESCO) è reglada en l'art. 38 da la lescha davart la protecziun da la natira e da la patria en il chantun Grischun dals 19 d'october 2010 (lescha chantunala davart la protecziun da la natira e da la patria, LNPGR; DG 496.000) ed en l'art. 23 da l'ordinaziun chantunala davart la protecziun da la natira e da la patria dals 18 d'avrigl 2011 (ONPGR; BR 496.100). Il PNS na croda betg sut las disposiziuns davart parcs d'impurtanza naziunala en la LPNP, per el vala la LPN. Il PNS avess però sa basond sin l'art. 23m al. 2 LPNP la pussaivladad da survegnir il label da parc tenor l'art. 23j LPNP. Plinavant è il PNS liber da far dumondas da contribuziun per tscherts projects. Pussaivladads da promoziun existan da cas en cas en il rom da la realisaziun da la nova politica regionala (NPR) resp. da la lescha per promover il svilup economic en il chantun Grischun (lescha per il svilup economic, LSE; DG 932.100) u per mesiras da la protecziun da la natira e da la cuntrada (art. 37 LNPGR), eventualmain da la protecziun da la patria (art. 39 LNPGR) sco er per la perscrutaziun e per la lavur da publicitad en quests secturs (art. 40 LNPGR). In'ulteriura opziun per finanziair prestaziuns consista dal fatg ch'il PNS sco conpurtader dal reservat da biosfera da l'UNESCO Engiadina Val Müstair

furnescha prestaziuns sut quest tetg. Il chantun Grischun sustegna il reservat da biosfera da l'UNESCO Engiadina Val Müstair sa basond sin l'art. 38 LNPGR actualmain cun 150 000 francs per onn. Sch'il purtader inoltrass al chantun in nov plan da manaschament cun ina glista correspondentia da projects per la zona centrala (ch'è identica cun il PNS) che mussa las prestaziuns ed ils custs, pudessi vegnir examinà da pajar contribuziuns al manaschi dal PNS sur il reservat da biosfera da l'UNESCO Engiadina Val Müstair. Sche la finanziaziun da parcs vegniss applitgada per sustegnair finanziailmain il PNS (directamain sur il label da parc u indirectamain sur il reservat da biosfera da l'UNESCO) sto vegnir resguardada ina segunda pretensiun a la finanziaziun d'in parc. Tenor l'art. 38 al. 2 LNPGR conceda il chantun contribuziuns a parcs mo, sche las vischnancas, eventualas terzas personas sco er la confederaziun sa participeschan en moda adequata vi dals custs. Sut quest aspect vegn la dumonda respundida sco suonda:

Tar la dumonda 1: I na stat betg en discussiun ch'il parc naziunal svizzer ha ina funcziun da signal lunsch sur ils cunfins chantunals ora ed è d'ina impurtanza speziala per il turissem en il chantun sco er per l'economia regionala.

Tar la dumonda 2: I n'è betg ina dumonda da la voluntad da la regenza da sustegnair il PNS analogamain als auters parcs en il chantun, mabain da las premissas legalas che stuessan vegnir ademplidas dal PNS per ch'el possa vegnir tractà finanziailmain da medema maniera sco ils auters parcs dal Grischun.

Tar la dumonda 3: Sut las premissas menziunadas sa basond sin l'art. 38 LNPGR fissi pussaivel da pajar contribuziuns da gestiun en il rom d'ina cunvegna da prestaziun.

Tar la dumonda 4: Per projects singuls stattan a disposiziun al PNS tut las mesiras che pon vegnir sustegnidas sur la LNPGR. Contribuziuns che sa refereschan a projects d'investiziun u a projects da svilup turistics pon vegnir pajadas – sa basond sin la LSE – en furma d'emprests tenor NPR u sco contribuziuns à fonds perdu.

Tar la dumonda 5: Sut las premissas menziunadas sa basond sin l'art. 38 LNPGR fissi pussaivel da pajar contribuziuns al manaschi dal center da visitadras e visitaders e da furmaziun a Zernez, e quai en il rom d'ina cunvegna da prestaziun.



En num da la Regenza

Il president:

Il chancelier:

Dr. Jon Domenic Parolini

Daniel Spadin